

[49] CHAPITRE III.

DE QUELQUES BAPTESMES PLUS SIGNALÉS EN LA RESIDENCE DE SAINT IOSEPH.

LE nombre de ceux qu'on a fait Chrestiens cette année, és Residences de la Conception & de S. Ioseph, n'est pas moindre que celuy des années precedentes; nous auons maintenant cette consolation qu'on ne baptise pas feulement les enfans & les malades, mais encor les adultes qui sont pleins de vie & de fanté; les graces que Dieu fait à quelques vns de ces bons Neophytes sont signalées; i'en toucheray quelques-vnes en ce chapitre, que ie presenteray comme vne riche recompense à tous ceux qui procurent deuant Dieu & deuant les hommes, la conuersion de ces peuples.

Nous baptisames à mesme iour trois chefs de familles qui se retiroient ordinairement à Tadouffac, mais le desir de leur salut leur a fait prendre party avec le[s] [50] Chrestiens de la Residence de Saint Ioseph, le plus signalé des trois se nomme Charles Meiachkasat. Monsieur le Cheualier de Montmagny, nostre Gouverneur le voyant si zelé pour nostre croyance, voulut estre son parrain: Je dirois volontiers de luy ce que nostre Seigneur disoit de Nathanaël: *Ecce verè Israëlita in quo dolus non est*, ce bon homme est vn vray Israélite, il n'est composé ny de fraude ny de supercherie, c'est la mesme candeur il a tousiours esté porté au bien, mais depuis enuiron deux ans Dieu l'a fortement touché; Il nous a raconté, qu'e-